

Titel: Die getrouheid van God
Pastor: Sias le Roux
Datum: 9 Januarie 2011
Tyd: 09:00



a: Mattheus 25:1-29 OV

¹ Dan sal die koninkryk van die hemele wees soos tien maagde wat hulle lampe geneem en uitgegaan het om die bruidegom te ontmoet. ² En vyf van hulle was verstandig en vyf dwaas. ³ En toe die wat dwaas was, hul lampe neem, het hulle geen olie met hulle saamgeneem nie. ⁴ Maar die verstandiges het olie in hulle kanne saam met hul lampe geneem. ⁵ En terwyl die bruidegom talm om te kom, het hulle almal vaak geword en aan die slaap geraak. ⁶ En middernag was daar 'n geroep: Daar kom die bruidegom; gaan uit hom tegemoet! ⁷ Toe staan al daardie maagde op en maak hulle lampe gereed. ⁸ En die wat dwaas was, sê aan die verstandiges: Gee vir ons van julle olie, want ons lampe gaan uit. ⁹ Maar die verstandiges antwoord en sê: Miskien sal daar nie genoeg wees vir ons en vir julle nie. Maar gaan liever na die verkopers en koop vir julleself. ¹⁰ En onderwyl hulle gaan om te koop, het die bruidegom gekom. En die wat gereed was, het saam met hom ingegaan na die bruilof, en die deur is gesluit. ¹¹ Later kom toe die ander maagde ook en sê: Meneer, Meneer, maak vir ons oop! ¹² Maar hy antwoord en sê: Voorwaar ek sê vir julle, ek ken julle nie. ¹³ Waak dan, omdat julle die dag en die uur nie weet waarop die Seun van die mens kom nie. ¹⁴ WANT dit is soos 'n man wat op reis wou gaan en sy diensknegte roep en aan hulle sy besittings toevertrou. ¹⁵ En aan die een gee hy vyf talente en aan die ander twee en aan die ander een, aan elkeen na sy vermoë; en hy het dadelik op reis gegaan. ¹⁶ En die een wat die vyf talente ontvang het, het daarmee gaan werk en vyf ander talente gewin. ¹⁷ Net so het die een wat die twee ontvang het, self ook twee ander verdien. ¹⁸ Maar hy wat die een ontvang het, het in die grond gaan grawe en die geld van sy heer weggesteek. ¹⁹ En ná 'n lang tyd het die heer van daardie diensknegte gekom en met hulle afgereken. ²⁰ En die een wat die vyf talente ontvang het, kom en bring vyf ander talente en sê: Meneer, vyf talente het u aan my toevertrou; hier het ek vyf ander talente daarby verdien. ²¹ En sy heer sê vir hom: Mooi so, goeie en getroue dienskneg, oor weinig was jy getrou, oor veel sal ek jou aanstel. Gaan in in die vreugde van jou heer. ²² En die een wat die twee talente ontvang het, kom ook en sê: Meneer, twee talente het u aan my toevertrou; hier het ek twee ander talente daarby verdien. ²³ Sy heer sê vir hom: Mooi so, goeie en getroue dienskneg, oor weinig was jy getrou, oor veel sal ek jou aanstel. Gaan in in die vreugde van jou heer. ²⁴ En die een wat die een talent ontvang het, kom ook en sê: Meneer, ek het u geken, dat u 'n harde man is wat maai waar u nie gesaai het nie, en bymekaarmaak waar u nie uitgestrooi het nie; ²⁵ omdat ek bang was, het ek gegaan en u talent in die grond weggesteek. Hier het u wat aan u behoort. ²⁶ Maar sy heer antwoord en sê vir hom: Jou slegte en luie dienskneg, jy het geweet dat ek maai waar ek nie gesaai het nie, en bymekaarmaak waar ek nie uitgestrooi het nie. ²⁷ Daarom moes jy my geld by die wisselaars gestort het, en ek sou by my koms wat aan my behoort, met rente ontvang het. ²⁸ Neem dan die talent van hom weg en gee dit aan die een wat die tien talente het; ²⁹ want aan elkeen wat het, sal gegee word, en hy sal oorvloed hê; maar van hom wat nie het nie, van hom sal weggeneem word ook wat hy het.

b: God se karakter

Psalm 119:89-90 NV

⁸⁹ U woord, Here, staan vir altyd vas in die hemel. ⁹⁰ U trou is van geslag tot geslag; U het die aarde gemaak, en dit staan vas.

Psalm 89:6-8 NV

⁶ Die hemel loof u wondermag, Here, die hemelinge loof u trou.

c: God se onwrikbare liefde

Psalm 92:2-3 NV

² Dit is goed om die Here te loof, om u Naam te besing, Allerhoogste, ³ om elke môre van u liefde te getuig, en elke aand van u trou,

Psalm 108:5 NV

⁵ want u liefde reik tot in die hemel, u trou tot in die wolke.

d: Ons ingesteldheid

Psalm 37:3-4 OV

³ Vertrou op die HERE, en doen wat goed is; bewoon die aarde en beoefen getrouheid, ⁴ en verlustig jou in die HERE; dan sal Hy jou gee die begeertes van jou hart.

Psalm 100:4-5 NV

⁴ Gaan sy poorte binne met dankliedere, sy tempel met lofsange, dank Hom, prys sy Naam, ⁵ want die Here is goed, aan sy liefde is daar geen einde nie, sy trou duur van geslag tot geslag.

I Thessalonisense 5:16-24 NV

¹⁶ Wees altyd bly. ¹⁷ Bid gedurig. ¹⁸ Wees in alle omstandighede dankbaar, want dit is wat God in Christus Jesus van julle verwag. ¹⁹ Moenie die werking van die Heilige Gees teenstaan nie. ²⁰ Moenie profesieë geringskat nie, ²¹ maar toets dit alles, behou wat goed is, ²² en bly weg van alles wat sleg is. ²³ Mag God, wat vrede gee, julle volkome aan Hom toegewyd maak en julle geheel en al, na gees, siel en liggaam, so bewaar dat julle onberispelik sal wees wanneer ons Here Jesus Christus weer kom! ²⁴ Hy sal dit ook doen, want Hy wat julle roep, is getrou.